
Учкўприк тумани адлия бўлими томонидан сайёр қабул ўтказилди

Учкўприк тумани адлия бўлими томонидан аҳоли билан тўғридан-тўғри мулоқот қилиш, мавжуд муаммоларни аниқлаш, уларни бевосита жойида бартараф этиш мақсадида тумандаги "Тепакўрғон" маҳалла фуқаролар йиғинида сайёр қабул ўтказилди.

Сайёр қабулда тумандаги давлат ташкилотларининг масъул ходимлари, адлия бўлими, Халқ қабулхонаси ва юридик хизмат кўрсатиш маркази вакиллари ҳамда хусусий нотариус иштирок этди.

Қабул давомида фуқаролар томонидан тадбиркорлик ва солиққа доир, уй-жой, мерос, ҳадя ва бошқа нотариал ҳаракатлар, давлат хизматлари кўрсатиш, нафақа ва пенсия ҳисоблаш, ФХДЁ органлари фаолиятига доир масалалар, маҳаллий давлат органлари ва маъмурий идораларнинг қарорлари, буйруқлари билан боғлиқ ҳолатлар юзасидан мурожаатлар билдирилди.

Фуқаролар томонидан билдирилган аксар масалаларга ҳамкор ташкилотлар билан биргаликда қабул давомида ечим топилди. Қолган мурожаатларга масъуллар томонидан ҳуқуқий маслаҳатлар берилди.

2023-06-22 16:47:42